

24 FEB 1997

DASAR PRAGMATIK KERAJAAN JADI CONTOH, KATA DR LING

SEREMBAN, 24 Feb (Bernama) -- Dasar kerajaan yang pragmatik dengan disertai usaha gigih rakyat telah membolehkan Malaysia mendapat pengiktirafan dunia sebagai negara yang berpotensi dan dinamik dalam bidang ekonomi.

Menteri Pengangkutan Datuk Seri Dr Ling Liong Sik berkata Malaysia kini menjadi contoh terbaik kepada negara dunia ketiga dan negara sedang membangun yang lain.

"Bagaimanapun, cabaran kita pada tahun-tahun akan datang sebelum negara memasuki abad ke-21 ialah mengekalkan pertumbuhan ekonomi yang pesat seperti yang dinikmati sekarang," katanya.

Dr Ling, yang juga Presiden MCA, berucap pada majlis makan malam amal Pusat Haemodialisis Mawar yang dihadiri Perdana Menteri Datuk Seri Dr Mahathir Mohamad di Padang NS di sini malam ini.

Beliau berkata kerjasama yang sedia terjalin antara parti-parti komponen Barisan Nasional (BN) akan terus menjadi asas kepada kestabilan politik negara dan seterusnya memastikan ekonomi terus mantap.

Katanya, usaha membina sebuah masyarakat prihatin dan penyayang tidak hanya bergantung kepada kerajaan atau individu tetapi juga kepada suatu sistem kekeluargaan yang kukuh dan teguh.

"Dalam aspek ini, MCA akan sentiasa berusaha dan bekerjasama dengan rakan-rakan dalam BN untuk mencapai matlamat itu," katanya.

-- BERNAMA

RAB AKD